

Naqqiut 2

Siunnersuut 23. Marts 2017-imeersaq taarsissavaa

Tunngavilersuut: Naqqiummik naqqinneqarpoq siunnersuutip kalaallisoortani § 1, nr. 2.

Uunga siunnersuut: Aningaasarsianit akileraarutit pillugit Inatsisartut inatsisaata nr. 12, 2. november 2006-imeersup allanngortinneqarneranik Inatsisartut inatsisaat nr. xx, xx.xxx 2017-imeersaq

(Aktiaatillit taarsigassarsiaasa akileraaruserneqartalernissaat, atornerluisoqarsinnaanera akior-niarlugu maleruagassaq, sulisorisanik atukkiussinermi akileraarutininik unerartitsisussaataaneq il.il.)

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaatigut nr. 3, 30. november 2009-meersukkut, Inatsisartut inatsisaatigut nr. 20, 18. november 2010-meersukkut, Inatsisartut inatsisaatigut nr. 37, 9. december 2015-imeersukkut, Inatsisartut inatsisaatigut nr. 7, 6. juni 2016-imeersukkut allanngortinneqartumi, kingullermillu Inatsisartut inatsisaatigut nr. 29, 28. november 2016-imeersukkut allanngortinneqartumi makku allannguutigitinneqarput:

1. § 1, imm. 1, nr. 3, ima oqaasertaqarpoq:

”3) aktiaateqarluni aamma piginneqataassuseqarluni ingerlatseqatigiiffiit Kalaallit Nunaanniittut nalunaarsorneqarsimasut, imaluunniit Kalaallit Nunaanni aqutsisoqartut,”

2. § 1, imm. 3-p kingornagut imm. 4-tut ilanngunneqarpoq:

”Imm. 4. Tamakkiisumik akileraartussaataaapput danskisut innuttaassuseqartut, § 1, imm. 1, nr. 1-imi 2-milu pineqartunut ilaanngikkaluarlutik Namminersorlutik Oqartussanit, kommunit pisortalluunniit suliffeqarfiutaannit il.il. allanit, naalagaaffiup avataanut suliertortinneqartut, aammalu nunat tamat isumaqatigiissutaat naapertorlugu nunami najorallakkaminni akileraartussaataaangitsut. Oqaaseqatigiit siulliit malillugit akileraartussaataasunut ilaapput aappaasut inunnut taakkununga inooqataasut aamma meeqqat taakkunani najugaqartut, ukiup aningaasarsiorfiusup aallartinnerani sulii 18-iliisimangitsut, aappaasut meeqqallu taakku danskisut innuttaassuseqarpata aammalu aningaasarsianit akileraarutininik, nunami takornartami maleruagassat inunnut tassani najugaqartunut atuuttut naapertorlugit akiliisussaataaangippata.”

3. § 2, imm. 1, nr. 15, ima oqaasertaqarpoq:

”15) pigisamik aalaakkaasumik Kalaallit Nunaanni pigisaqartut tassanngaluunniit isertitaqartut, matumani aamma tunisaqarnikkut, imaluunniit”

4. § 3, imm. 1, nr. 8-p kingornagut nr. 9-tut ilanngunneqarpoq:

”9) Inuit Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqatigiissut naapertorlugu ikiuuttut, aatsaalli inuit pineqartut inatsimmi § 1, imm. 1, nr. 1-2-mi pineqartunut ilaanngippata.”

5. § 16-ip kingornagut ilanngunneqarpoq:

”§ 16 a. Ingerlatseqatigiiffik il.il. § 1, imm. 1, nr. 3-mi 4-miluunniit pineqartunut ilaasoq, kiisalu ingerlatseqatigiiffik il.il. taamaaqataa nunani allani angerlarsimaffeqartoq aningaasanik inummut, toqqaannartumik toqqaannanngitsumilluunniit atugassaqartitsippat, taarsigassarsisitsippat qularnaveeqqusiippalluunniit, taarsigassarsiat aningaasarsianit akileraarutit pillugit inatsimmi maleruagassat nalinginnaasut naapertorlugit tigusatut taarsigassaannngitsutut isigineqassapput, aatsaalli taarsigassarsisitsisoq taarsigassarsisorlu § 86, imm. 3-mi pineqartutuut imminnut attuumassuteqarpata. Oqaaseqatigiit siulliit taarsigassarsianut il.il. nalinginnaasumik niuernermet atatillugu taarsigassarsiaritinneqartunut il.il., imaluunniit aningaaserivinnit taarsigassarsisitsisarfinnillu taarsigassarsianut nalinginnaasunut atuutinngillat. Oqaaseqatigiit siulliit aamma atuutinngillat Aktiaateqarluni ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi § 115 a naapertorlugu aamma Piginneqataassuseqarluni ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi § 50 naapertorlugu taarsigassarsianut.

Imm. 2. Taarsigassarsiat imm. 1 naapertorlugu akileraaruserneqartut taarserneqarpata, aningaasat taarserneqartut ingerlatseqatigiiffiup aningaasarsiaasa akileraaruteqaataasussat naatsorsorneranni ilanngunneqassanngillat.”

6. § 46, imm. 6-ip kingornagut imm.7-itut ilanngunneqarpoq:

”Imm. 7. Imm. 1 aamma 2 atuutissanngillat soraarnerussutisiaqarnissamut inuunermulluunniit sillimmasiineramik aaqqissuussinermut imaluunniit soraarnerussutisiaqarnissaq siunertaralugu ileqqaakkanut piffissami qaammatinit 23-nit sivisunerusumi akiliuteqartoqarsimanngippat, imaluunniit aaqqissuussinerep ileqqaakkalluunniit piffissami atorunnaarsitsiffiusumi nalinga 10.000 kr.-init minneruppat.”

7. § 69-ip kingornagut ilanngunneqarpoq:

”§ 69 a. Akileraartussaataasut marloriaammik akileraarnissaq pinngitsoorniarlugu isumaqatigiissummik iluaquteqassanngillat, pissutsit pisullu soqutiginaatillit tamaasa eqqarsaatigalugit aalajangerneqarsinnaasorinarpat iluaqutiginninniarnaq, aaqqissuussinerni suniluunniit imaluunniit nuussinerni suniluunniit toqqaannartumik toqqaannanngitsumilluunniit iluaqutiginninnermik kinguneqartoq siunertat pingaarnerit ilagigaat, aatsaalli pisut taakku apeqqutaatillu-

git iluaqutiginninnissamik akuerineqarnissap, isumaqatigiissummi aalajangersakkap pineqartup imarisaanut siunertaanullu naapertuuttuunera uppersarneqanngippat.”

8. § 75, imm. 1, nr. 2-p kingornagut nr. 3-tut ilanngunneqarpoq:
”3) § 46, imm. 7 naapertorlugu tunniunneqartut.”

9. § 75, imm. 3, nr. 2-mi allassimasoq ”76, imm. 4” allanngortinneqarpoq ima ”76, imm. 5”

10. § 76, imm. 3-p kingornagut imm. 4-tut nutaatut ilanngunneqarpoq:
”Imm. 4. Inummut, suliffeqarfimmit nunami maani angerlarsimaffeqanngitsumit nunami maani sulisussat atukkiunneqarsimasumut akissarsianik tunniussinermi unerartitsisussaati-taaneeq suliamik sullinneqartup isumagisassaraa. Tamannali taamaallaat atuuppoq suliaq suliffeqarfiup nunami maani ingerlataata ilagippagu. Suliffeqarfik nunami maani angerlarsimaffeqanngitsaq inuup aningaasarsiai A-t, paasissutissallu allat pineqartup akileraa-rutaasa A-t nalunaarutigineqarnissaannut, unerartinneqarnissaannut akilerneqarnissaannullu pingaarutillit pillugit uppersaatinik tunniussaqaanngippat, suliamik sullinneqartup akileraa-rutit A-t akiligassanit tamarmiusunit naatsorsussavai. Oqaaseqatigiit siulliit atuutissanngillat suliffeqarfik nunami, Namminersorlutik Oqartussat akileraarutinik unerartitsisarneq pillugu ikioqatigiinnissamik isumaqatigiissuteqarfigisaani angerlarsimaffeqarpat, tak. § 114, imm. 2, nr. 3.”

Imm. 4-6 matuma kingorna tassaalerput imm. 5-7.

§ 2

Imm. 1. Inatsit 1. juli 2017-imi atortuulissaaq.

Imm. 2. § 1, nr. 1, nr. 3, 4 aamma 7 ukioq aningaasarsiorfiusoq 2017 aallarnerfigalugu aningaasarsiat akileraaruteqaataasussat naatsorsorneranni atuutissapput.

Imm. 3. § 1, nr. 5 taarsigassarsianut 1. januar 2017 aallarnerfigalugu taarsigassarsiaritinne-qartunut atuutissaaq.

Imm. 4. § 1, nr. 10, 1. januar 2018 aallarnerfigalugu atuutissaaq.

Namminersorlutik Oqartussat, ulloq xx.xxx 2017

Kim Kielsen